

Guido Jörg – in coach pragmatic e prudent

Il manader da l'Agentura da novitads rumantscha (anr) va en la pensiun anticipada

DA MARTIN CABALZAR

■ **Cun la fin da l'onn terminescha Guido Jörg (61), il manader da l'Agentura da novitads rumantscha (anr), s'enter ina fritgavla activitad da 23 onns ses engaschament parzial tar la anr per ir en la pensiun anticipada.** Già dapi il cumenzament da l'Agentura da novitads rumantscha (anr) è *Guido Jörg* stà da la partida e quai en differentas funcziuns, dapi 1997 sco mainagestiu. La midada al timun da las medias rumantschas stat er en connex cun la transfurmaziun da l'Agentura da novitads rumantscha en la Fundaziun Medias Rumantschas che va en vigur cun Bumaun 2020.

S'engaschè per soluziuns pragmaticas

Sco anteriur commember da la schefredacziun dal «Bündner Tagblatt» e responsabel per la produziun ed il marketing è Guido Jörg stà bain preparà per surpigliar il timun operativ da la nov fundada anr. Resguardond ils interess divergents dals differents partenaris da las medias rumantschas è Jörg adina puspè s'engaschè cun cumpetenza e calma per soluziuns pragmaticas. En scadin cas ha el fatg buna lavur, cunzunt davos las culissas, ed uschia preservà la anr da bainqual situaziun burascula e turbulenta



S'enter in engaschi da 23 onns sco mainagestiu da l'Agentura da novitads rumantscha va Guido Jörg la fin da l'onn en pensiun anticipada.

FOTO TH. GSTÜHL

ch'avess mess en privel betg mo l'existenza da la anr, mabain da la pressa rumantscha insumma. Per mai sco schefredacatur da La Quotidiana – sco clienta principala da la anr – è Jörg stà in ferm sustegn ed in partenari fitg fidà, loial e servetschaivel. Senza sia flexibilitad e prontadad per soluziuns simplas e pragmaticas n'avess La Quotidiana cun tut sias turbulenzas probabel betg pudì exister 22 onns. Guido Jörg è adina s'engaschè per il bun da la chaussa, senza far bahautscha e senza tschertgar l'attenziun da la publicitad.

In bun coach per sia redacziun

Sco anteriur coach e trenader da ballape e da hockey sin glatsch ha el chapì da motivar sia squadra e da posizunar sias collavuraturas e ses collavuratur tenor lur qualificaziuns e lur fermezzas. El ha dà a ses collavuratur las libertads necessarias per ch'els possian far lavur creativa. Ed el ha manà ina redacziun che consista da numerus individualists cun sentiment psicologic e chapientscha per tschertas flaivezzas umanas. El ha dentant era pretendì da ses confidads fidadad ed exactadad, dentant era sustegnì lur interess vers il cussegl da fundaziun e defendì consequentamain lur lavur betg adina simpla. Cun ina pitschna squadra èsi la finala reussì d'alimentar di per di

ina gassetta quotidiana, pliras gassetas localas ed ils meds electronicis cun in servetsch da basa en tut ils idioms ed en rumantsch grischun. Uschia èn la anr e ses servetschs schurnalistics daventads ina mesira impurtanta, efficianta, gea, indispensabla per mantegnair e promover il rumantsch cun intermediar infurmaziuns e derasar il pled scrit en il mintgadi rumantsch.

LQ ed anr sco schumellins siames

En sia lavur è Jörg vegnì sustegnì vigurusamain durant ils emprims passa 18 onns dal parsura dal cussegl da fundaziun e posteriur cusseglier guvernativ *Jon Domenic Parolini*. Ils ultims onns han *Martin Gabriel* e *Gian Michael* ademplì questa funcziun. Tar *Cecilia Manetsch-De-rungs* è la contabilitad stada en buns mauns.

LQ ed anr èn stads schumellins siames. Els èn naschids en il medem mument, han dà sustegn vicendaivel ed era gè in destin cuminaivel. L'existenza d'in ha dependì da l'existenza da l'auter. Sco schefredacatur partent da LQ èsi perquai mes desideri sincer d'engraziar a l'Agentura da novitads rumantscha (anr) e cunzunt a ses manader partent Guido Jörg ed a sia squadra redacziunala per il grond sustegn e l'empernaivla collavuraziun durant tut quests passa 22 onns.